

四庫全書

集部

欽定四庫全書

集部
南齊文紀卷十九

詳校官庶吉士臣瑚圖禮

主事銜臣徐以坤覆勘

總校官庶吉士臣何思鈞

校對官中書臣李斯咏

謄錄監生臣章玉輅

欽定四庫全書

南齊文紀卷九

明 梅鼎祚 編

江淹二

始安王拜征虜將軍丹陽尹章

既耀軒禮涵蕤龔恩夾泗醜默臣少識猶晦哀辛方襲
藉以毓采上霄搏華中漢欽惠延光偁爵假息不悟瑤
離降映繩河低文遂刻言闕禁徒第京部進憲蒙淺塵
荼徒盈還迷懷悚風製罔樹循伏憂歎滅慮焦衷不勝

荷佩之情

始安王拜征虜將軍南兖州刺史章

絢服騰炤懋冊凝芬膏對迷隆慙泣交集臣職右南陽
蒲鞭之政任重臨淄無遣獄之化自分金帝闕參風尹
訟壁緯裁復圭露詎淹不悟旻靈拂采霄景汰色復交
書河楚置傳江吳環章清潤旂文肅路寵艷內維榮炫
外圉方梗名慮有陋孳識沖生覲氣安以輸謝不勝荒
震屏營之情

建平王慶少帝登阼章

上書皇帝陛下伏承肇嗣天震雲飛璿極戎夏歸服民
靈以戴臣聞黃旗紆藻瑞益於姬帝紫雲垂蓋効異於
劉后實乃深賜天衷廣映祇迹伏惟陛下騫英駕聖涵
靈蹤睿矩心明裁繩道喆時遠裔雒符雜沓河紀是以
膺符寶宮輯命珍殿誼洗雲密德徽嫺夏濬發洪源長
祚偉業方絢聲金圖騰華玉厯波淪下氓炎躔上漢臣
公享締寵誠兼親屏禮升之日守官楚甸不獲勉躬儲

外奉敬行間魂泣江郊心泣京國不任悲仰哽噎之情
建平王慶王太后正位章

上書王太后殿下伏承以今日淑辰曾光樞景慶芬祇
外禮蔚寰中臣聞道懋第昌業廣祉盛藻秩攸臻憲章
斯飾伏惟殿下柔明固天夙資龔懿芬蕙翔聲端簡散
譽冠采摯姪騰耀徽似丹陵蘊德玄丘棲聖煙煥國牒
衍溢民聽涵道席教且泳且洽臣忝任蕃圉無由隨例
闕廷不勝荒情

建平王慶江皇后正位章

上書皇后殿下伏承以嘉月惠時膺曜宸正翠珩炤品
綸組在飾休遍函夏譽殷靈昧伏惟殿下岳曜靜德式
懷謙順升降圖傳左右詩史夙鏡茂資早摘芳訓故以
騰馥祕閨寫問中惟今靈緯載升崇正輝典衛教紫庭
麗軌華屋聲激綺組風偃家邦黎玄湊仁雲祇宅慶遠
適有聞莫不傾渥臣限外任無由恭列軒屏不勝荒情

建平王拜右衛將軍荊州刺史章

珪冊停徽車旗寫曜襲禮炫衷迎恩震色臣聞爵以能
委命以績降亦有玄雲結吹褒成燠之厚朱箱累轍崇
試宰之高而臣紐組頒守要玉備政績廢江區聲隘河
部浮榮曠年叨光賒日諒以具察輿歌取鏡民誚不悟
皇德至凝亭物惟渥復使承官楚封祇秩漳土任班河
冀事亞嶠陝橫術輻湊殷氓訟積寧曰明哲疇尅勝寄
雖歷丹局終懼蒙咎不任銘戴匪處之情

蕭領軍拜侍中刺史章

上書皇帝陛下即日詔書以臣為侍中驃騎大將軍開
府儀同三司班劔三十人等持節都督如故峻命在廷
光冊充軒虹駿聳服朱曦佇蓋寅對以懷心影若傾臣
功乏至道不足以題象魏績非振民無可以書廟閣半
漏未晏中鐘而驚實忌微庸起乘盛服竊疑國寵頓萃
末躬今寰海順典瓊都咸光調御惟新鎔製就始良宜
整變獻經詮明典緯九河式耀三辰載晰不悟陛下皇
靈曲溢大賚斯降而鴻賞之行乃於臣始非所以騰振

遙風激昂品流與人之誦具聞其黷頻露慊祈未叨鑒
順今使虔禮青軒謹躬丹墀憂符怵惕慙屬兼軫不任
屏營之情

建平王散五刑聘隱逸教

府州國紀綱吾謬繼朝組乃班恩命重渥華蕃踐寵懋
甸永言政惠良攬清寢况舊楚地曠前郢氓殷水帶枉
渚山匝魯陽自頃田邑榛故封井萊蕪財賦方屈犴獄
實繁思所以厚風釐俗變瑟改調自五歲刑已下未送

臺者一皆原遣文武殫坐亦悉復職主局依舊施散薄
紓此懷

府州國紀綱夫矯夏已沒大道不行雖周惠之富猶有
漁潭之士漢教之隆亦見棲山之夫迹絕雲氣意負青
天皆待絳螭驤首翠虬來儀是以遺風獨扇百代餘烈
激厲後生斯乃王教之助古人之意焉吾枕駕舊楚憩
乘汀潭挹於陵之操想漢陰之高而山川遐久流風無
沫養志數人並未徵采善操將棄良用慨然宜速詳舊

禮各遣練招庶暢此幽襟以旌蓬華

蕭驃騎發徐州三五教

州府紀綱沈攸之背慢靈極稽誅之日久矣况稱兵江漢之上圖豐廟闕之下惡熾罪盈民靈所絕朝廷以尅晨纂嚴令與夙駕吾任先責遠義兼常慨挺刃投袂信見其時方當水斬龍蛟陸斷犀兕雖烈士銜志壯夫投槩然雲羅既舒宜廣威防所統郡縣便普三五咸依舊格以赴戎麾主者飛火施行

蕭驃騎築新亭壘埋枯骨教

府州綱紀夫汝南稱慈諒由掩骼廣漢流仁實存殯朽
近築製茲營崇堞峻湮古墟曩隧時有湮移深松茂草
或至刊薙憑壙動懷巡隍增愴宜並為收改勿毀莫祀
主局詳辨施行

蕭太傅東耕教

三府二州綱紀夫寶農賤貨綵炤周滕巡耕去販光炎
漢錄故能業滋都野產殷絃縣吾任屬弘寄思闡治源

慮以晨感情以宵嘆今玄司調氣青祇佇節陳

闕字既柔

服

闕字

方秀電爍有期桐萌無遠便當躬速紺耦道先列

辟事均暫勞迹在永豫可尅日備辦詳典施行

為錄公拜揚州恩教

昔召南分陝流甘棠之德平陽好道深獄市之寄吾忝
屬負荷任總侯伯受餞元戎作牧中甸此地五都雜會
四方是則而向隅之矜斯積納隍之歎猶繁興念下車
無忘待旦其齊禮導德致之仁壽弘漏網之寬申在宥之澤

遣大使巡詔

門下昔明王馭世巡獄采政睿后司朝觀俗調化故生
無鬱滯物獲脩通釐風拯患於茲為急朕以輜薄昧于
大道因璿璣之歷遵三德之運緬鑒前哲寤寐永歎思
所以聞訪治蠹詢求民瘼才寡務殷若無津滌故以情
深危薄心疚夙夜矣可普遣大使分行四方推賢薦能
問疾舉滯若其采野不聞犴訟有虧妨氓利害擾黷政
經者具以奏聞如其謹言嘉話真士智才亦依名騰上

隨事均量務取厥中朕將親覽以弘遠化

賜赦交州詔

門下交部昔值時諉負海不朝因迷遂往歸款莫由今
創制萬寓烟煴造物原形四裔澤浹中畿慙彼邊氓未
均王化宣弘遠仁蕩以更始可曲赦本州統內咸同曠
泰李叔獻一人即撫南土其股肱文武詳材選推并遣
大使宣揚朝旨

斷募士詔

門下設募取將懸賞購士蓋出權宜非曰經制頃者民
罹氛藹世襲艱阻因時流故浸以成俗斯風蕩而未返
且滋長逋逸開罪山湖遂乃黥刑不辱草竊無咎平政
察治萌合甄革自今已後可悉斷衆募

封江冠軍等詔

門下締基緯業序功攸急開厯闡祚酬庸為先故以式
藹叢書載炳前軌文仲假等或誠亮艱危効彰屯諛皆
績幹兩宣勤圖兼立宜各分珪社以酬厥勞謚

大赦詔

門下朕思弘風教而刑國猶積永言前烈兢歎載懷今
履端告始羣后執贄治洽樂交華夷同泰雖和慙擊石
采愧卿雲然景業初基義深恒典慶動玄靈歡溢都縣
憫彼幽黔猶隔茲澤思我兆民共熙至化

北伐詔

門下朕統厯馭政志包函夏庶總文軌無思不服而逃
馬狡虜久為邊虞及宋末不庭授策乖律北州外淪威

風內毀鑒彼隆替慨歎盈懷晃流濟河翦彼凶狄咸秩
中岳望祀汾陰則聲教邇矣猶以經綸惟始恩化甫洽
勞民擾衆為政所重故方輟六師按經九伐今淮泗告
驚羽書馳聞醜羯妖燼送死北垂徵天人之數撫自來
之會無勞遠兵剿撲為易蓋因茲大號蕩其巢藪可遣
使某官組甲十萬鐵騎千馬斜趨潁洛衝其要津某官
某虎旅八萬舳艫數千沿淮長驅稜威清汴某官某舟
師五萬直出淮淝某官控江右之銳駱驛既進某官某

率羽林勁勇為水陸形援某官某甲等並率義勇之衆
互盡犄角之機戎車戒路事宜總一使持節都督南徐
兗二州諸軍事後軍將軍南徐州刺史長沙王晃出次
江都為衆軍節度驍雄競奮火烈風掃尅定中原肅清
河洛便可內外纂嚴以時備辦

王僕射為左僕射詔

門下端貳樞秘實惟國楨緝典宣機所寄時彥尚書右
僕射領吏部尚書南昌縣開國公儉器懷明亮風情峻

遠業積珪璋才兼經緯況乃節亮帷幄譽敷端揆升授之宜蓋允具瞻可左僕射

王撫軍為安東吳興詔

門下震澤殷奧撫馭須才都官尚書撫軍潯陽郡開國公敬則志幹貞烈秉情開敏忠勤之至形乎出內必能綏懷大邦克隆美政

曲赦丹陽等四郡詔

門下朕興言民瘼昧旦求政所以庶存簡惠緝茲治道

而玉燭未調祥風尚鬱京輔及三吳昔歲水災秋登既罕今茲厲疾罹患者多納隍之歎為矜良深可曲赦揚州所統丹陽吳興南徐州所統義興等四郡其遭水尤劇之縣自今年以前三調未充而虛例已畢官長局吏應共備償者雖積事為愆情在可亮外詳所除以弘優澤

王僕射領太子詹事詔

門下管司東朝歷代所重自非國華莫允斯任侍中尚

書左僕射南昌縣開國公儉鑒識清瞻理懷秀澈績亮
朝端譽敷僉議贊業攸光物聽斯緝宜總二官以穆彝
序

何詹事為吏部尚書詔

門下官人之職實難其選所以弼諧彝品謨明庶績今
思治惟急彌不可曠侍中太子詹事戢業履修平體識
詳隱自升宮闈美譽咸聞必能無懈于位燮茲流序

王侍中為南蠻校尉詔

門下荆楚殷曠任重寄深毗佐之選非良勿授侍中領
秘書監驍騎將軍貞秉心貞元志局開亮績譽之美在
公屢彰必能贊政南紀播惠西夏

王光祿為征南湘州詔

門下衡岳名區荆湘奧壤自頃彫弊綏撫須賢侍中光
祿大夫丹陽尹僧虔德履淹邃識局詳正冲素之品朝望
攸歸歷職之庸載懷僉聽往往任沅湘餘惠在民今宜重
敷善政申此懿績

柳僕射為南充州詔

門下河兗衝要維扞中畿司牧之任宜詳其授後將軍
領軍新除尚書左僕射涇陽郡國公世隆業體淹濟思
情通敏功書王府績彰累任必能宣弘恩政威懷萬里
雖衰疾毀頓而禮有權奪

王僕射加兵詔

門下散騎常侍尚書左僕射太子詹事南昌縣開國公
儉忠欵昭著任寄隆深既光朝猷允屬民聽宜增威飾

以崇望實可加兵二百

立學詔

門下夫膠庠之典彛倫攸先所以昭振才端啓發性緒
弘世字氓納之軌儀是故五禮之迹可傳六樂之容不
泯朕自膺歷受圖志闡經訓且有司羣寮奏議橫集以戎
車屢警文教未敷思樂辟雍永言多慨今闕燧無虞時
和歲稔遠邇同風華夷慕義便可式遵前準修建教學
精選儒官廣延國胄

王鎮軍為中書令右光祿詔

門下綸言要密歷選為難優秩崇顯允在舊德使持節
都督江州豫州之新蔡晉熙二郡諸軍事鎮南將軍江
州刺史延之業履冲約秉情閑素譽彰頻試績著累朝
自居南服徽庸尅舉宜升寵章管兼樞秘

張令為太常領國子祭酒詔

門下庠議既敷縉紳攸屬師氏之任宜歸儒素散騎常
侍中書令驍騎將軍揚州大中正緒器識清簡理懷恬

約譽洽朝聞聲緝民聽必能闡揚玄宗式範胄子兼掌
宗伯望實惟宜

蕭冠軍進號征虜詔

門下維翰之重實資名品使持節都督郢州司州之義
陽諸軍事冠軍將軍郢州刺史南昌縣開國侯鸞體局
弘濟器操端敏自蒞任夏首美政殷流必能聿宣國化
以庇人瘼宜崇顯秩允茲聲望

褚侍中為征北長史詔

門下蕃佐須才非良莫寄侍中領步兵校尉炫識業清
悟思懷淹暢出內之譽日聞其美宜弼諧親屏以申茂
績

尚書符

起都宮軍局符蘭臺○宋
書沈攸之傳所載附後

侍御史大夫尊冠賤履君臣斯位愛順惡逆成敗可曉
未有憑陵我江郊侵軼我河縣而不流魂漂骨丹宗血
祀者也沈攸之寂寥無聞起自甲卒邀我百戰之軍乘
彼一捷之幸鑄山裂地紐紫要金擁旗蕃伯便無北面

之禮受符方屏即有專征之釁箕賦深斂毒被郢南枉
法矯刑毒聞荆西鬼怪其性故從始而遂終狼戾其志
乃延少而待老山陵不奔移殃為慶踐阼無賀按劍稱
予遂乃闕馳逆書亭照妖火此而可賒孰不可宥今遣
陳成叔彭文之等敢勁三萬前驅電耀呂安國任候伯
桓崇祖曹虎頭等樓艦五萬騎射蛟中流苟元賓郭文
孝程隱雋等輕舸二萬高旌蔽日周盤龍張文嘉薛道
淵等鐵馬五千龍驤後陣凡此諸帥莫不氣薄日月精

變虹蜺或飲羽石梁或超踰門樓索鐵拔距孤視萬旅
顧盼則前後生風暗鳴則左右激電然鑾戎薄臨驍虎
百萬六軍徐軌五輅遲旆丹艀發焰素甲生波樓煩白
羽投鞍成岳漁陽黑騎浴鐵為雲於是高山與深谷同
湮紫芝與白艾同滅不亦惜乎符至之日幸加三
省其驅逼寇手之人鋒陣塢壁之主若有投命軍門一
無所問或能因罪立績賞不示私斬祛射袂唯功是與
購募之科具列如上信如白水皦然無二臺明詳旨飛

火普加宣下文書千里馳驛

尚書符征西府討沈攸之

攸之自江陵至沌口聞齊王世子據

盜口不敢下因攻郢城時齊王輔政遣軍西討尚書符征西府

尊冠賤屨君臣之位奉順忌逆成敗斯兆未有憑陵我
郊圻侵軼我河縣而不焚師殪甲靡旗亂轍者也沈攸
之少長庸賤擢自閭伍邀百戰之運乘一捷之功鑄山
裂地腰金拖紫窮貴於國極富於家擁旄蕃伯便無北
面之禮受督方屏即有專征之釁橘柚不薦璆璫罕入

箕賦深斂毒被南郢枉繩矯墨害著西荆饕餮其心谿
壑其性從始至終沿壯得老今遂驅迫妖黨繕集佹卒
結費外城送死中甸此而可忍孰不可懷今遣新除使
持節督郢州之義陽諸軍事平西將軍郢州刺史聞喜
縣開國侯黃回員外散騎常侍冠軍驍騎將軍南臨淮
太守重安縣開國子軍主王敬則輔國將軍屯騎校尉
長壽縣開國男王宜與輔國將軍南高平太守軍主陳
承叔輔國將軍左軍將軍南濮陽太守葛陽縣開國男

軍主彭文之龍驤將軍驃騎行參軍軍主名宰精甲二
萬前鋒雲騰又遣散騎常侍領游擊將軍湘南縣開國
男新除使持節督湘州諸軍事征虜將軍湘州刺史軍
主呂安國屯騎校尉寧朔將軍崔慧景輔國將軍軍主
任侯伯輔國將軍驍騎將軍軍主蕭順之輔國將軍游
擊將軍軍主垣崇祖寧朔將軍虎賁中郎將軍主尹略
屯騎校尉南城令曹虎頭舳舻二萬駱驛繼邁又遣輔
國將軍後軍將軍右軍中兵參軍事軍主苟元賓寧朔

將軍撫軍中兵參軍事軍主郭文孝龍驤將軍撫軍中
兵參軍事軍主程隱雋輕艫一萬截其津要新除持節
督廣交越寧湘州之廣興諸軍事領平越中郎將征虜
將軍廣州刺史統馬軍主沌陽縣開國子周盤龍輔國
將軍後軍統馬軍主張文愷龍驤將軍軍主薛道淵冠
軍將軍游擊將軍并州刺史南清河太守太原公軍主
王敕勤龍驤將軍射聲校尉王洪軌龍驤將軍穴從僕
射軍主成置等鐵馬五千龍驤後陣凡此諸帥莫不勇

力動天勁志駕日接衝拔距鷹瞵鶚視顧盼則前後風
生暗鳴則左右電起以此攻城何城不克以此赴敵何
陣能堅然後鑾戎薄臨龍虎百萬六軍齊軌五輅輸旂
丹檻發照素甲生波樓煩白羽投鞍成岳漁陽墨騎浴
鐵為羣芝艾同焚悔將何及符到之日幸加三省其鋒
陣營壁之主驅逼寇手之人若有投命軍門一無所問
或能因罪立績終不爾欺斬裾射珥唯功是與能斬送
攸之首封三千戶縣公賜布絹各五千疋信如河海皎

然無貳飛火軍攝文書千里驛行

慰勞雍州文

皇帝謝鎮軍寧蠻二府雍州文武士庶等夫忠為令德
或感桀殺軀信實美行或殉義蹈節而沈攸之小豎反
覆稱逆西藩袁粲劉康潛使相扇遂擁據石頭並圖廟
社桀康既從王憲蒼黎同慶攸之孤州蟻聚勢必燼滅
刺史張敬義氣雲騰秣馬星驅全羽十萬殄茲氛鯨曾
不旋踵彼州南陽白水將相遺風忠義之士霜戈電發

但戎車暫動念原未寧冬寒卿皆無恙

袁友人傳

友人袁炳字叔明陳郡陽夏人其人天下之士幼有異才學無不覽文章倣儻清贍出一時任心觀書不為章句之學其篤行則信義惠和意罄如也常念蔭松栢詠詩書志氣跌宕不與俗人交俛眉暫仕歷國常侍員外郎府功曹臨湘令粟之入者悉散以贍親其為節也如此數百年未有此人焉至乃好妙賞文獨絕於世也又

撰晉史奇功未遂不幸卒官春秋二十有八與余有青雲之交非直銜杯酒而已嗟乎斯才也斯命也天之報施善人何如哉何如哉

建平王太妃周氏行狀

竊聞侯服之譽非黃冠能數王室之問寧卑衣所述諒畏褒虛美於君后被空名於鼎貴然有漢臣誅行晉史書德者亦云實而已焉伏見國太妃稟靈惟岳集慶自遠世擅淮汝族冠疇代故以載曜聲書式炳騰牒矣太妃

誕離明之正和涵雲露之中氣凝采齡歲貢章筭年若
乃彤管女圖之學纂組綺縞之工升降處謙之儀柔靜
居順之節莫不中道若性不嚴而成故譽滿閭閻聲聞
軒殿以元嘉某年歸于故司徒宣簡王既而第高恒倫
秩踰外品青軒華轂用光國輝素壁丹墀實隆家貴具
惟姻娣靡不式瞻而居尊以簡訓卑以弘躬謹蘭閨身
搗椒第若衛娥之炯行樊羸之映操方之蔑如也大明
二年宣簡王薨太妃藉悲用禮撫孤用慈柔懿之德愈

彰肅敬之問日被雖文伯之母言不踰闕宮相之主行
存乎勤無以過也大明某年拜建平王太妃是時令王
春秋方富德業未降藉茲金響終能玉播故綺襦出宰
弱冠升朝者亦太妃劬勞之訓也謂天盖高降年不永
以太豫元年二月三日薨於荊州之內寢凡厥遠邇以
哀以歎今祖行有期泉窆無遠素旂望路綵旌思歸所
以垂宣徽容髣髴金石者謹詳牒行狀具以申言

齊太祖高皇帝誄

日月鬱華風雲黯色傷動紫微悲匝璇極嗚呼哀哉粵
夏四月辛卯將遷座于泰安陵龍鑾既整羽衛以陳深
酸舊物掩咽故臣嗣皇帝永訣丹掖叫號青墀攀神光
之一絕慟遠邇之何期弓劍有慕纂德寫辭僉曰若稽
古聖璿圖靈鏡星樞發祥電光啟命誕惟弱齡惠志聰
情如金如璧爰秀爰英於鑠冠歲騰華流藝允文允武
克明克睿聿尚登學嚴道遵師宣敷五禮優游六詩上
炫舊滯旁鏡前疑才聲艷采筆盡麗辭在支斯悌于親

伊孝儉泰共色夷阻一貌遊情總矩縱心蹈教鄉術式
慕州閭是效業優登仕先哲攸懋矧乃寥廓淵規邃構
官府天地舟輿宇宙龍靜鳳戢斂奇揜秀昔在帝劉王
室放命狡焉偽誕晦朔陵正鋒車北軼燿火南盛太祖
時乘爰茲發迹塞井滅勲夷竈龕敵賞鏤王圖功旣帝
冊乃厲中葉天未斂難兵百表曹禍十楚漢吳地前崩
越壤首亂街號燿盛火烈金斷聚甲如陵獻俘為觀北
楚倔强曾未屈膝雲屯被野魚麗亘日廟勇既消國圖

方匱神冊天開雄略世出凶劒鱗沈醜戈羽逸隻騎不
返騎輪無匹厥庸戾止離珮委他榮鬱閭闔寵重山河
皇彛有文朝采方謁頻煩金紐左右緹蓋毗戎肅禁叅
輦侍旆譽馥區中道愛氓外河濟國險淮泗邦塵要藩
重設匪賢則親亦既推轂擁土庇民聲稜絕俗威瞻殊
隣宋主陵遐紫殿遏密話言之詔貽在英粹寅亮大寶
數綸妙秘世識機鑒物宗淵懿無負匪練靡輿不洎三
階既馴五精惟至彭蠡九江地盡襟製亦有劉範衣纓

是絕躍馬山岫泛舟河澨編鎬星流紅旗電結鳩翼競
扇豺牙爭礪禍纏紫禁兵交丹衛瑤祀若旂金宸如綴
朝野傾儀咸歸上德實賴至公瀉家提國懷險實泰襄
危必克機蓮朝旦功定曠黑妙物更配具章重則深居
撫外遙棲縣默高秩方臻元禮有序王曰念哉輝寵是
與職褒宮閣任卷文武飾華麗貂縈金疊組宏猷溢俗
曾芬冠古憬彼朱方亦惟宗秩陰圖食昴潛謀貫日征
輪未誓偏旗銜律原燎既寂世囂伊謚爰崇爰貴以望

以實鴈縣告靜象郡無虞香鬱遠域清麗瓊都國填氓
負朝委事虛實賢哲相獄曜神居功美既損道富去益
再紐契訓重匡禹迹方同范張濯情汾射散簪山郊解
珮松石潁霞拂朝蒼烟惜夕韻屬玄經恩流金液靈厭
霸德少帝告豐滅慈滅養抵仁抵信枉獄炎鑪淫刑霜
刃剖忠翦義樊稚斲櫬慄慄萬氓曰怨曰震妖蜮將崩
災裂昊蒼况乃鼎國資滌資匡臨朝闡命遏昏立綱事
縣毗漢義締翼商既綏地職亦懋天工權輿典緯俾作

司空黼黻珣戈祐宇升庸徒賜先袞爰永渥冲寶曰驃
騎卷迹辭功寰寓睦政畿甸綸風沈氏滔天勃逆舊楚
氣蹂黃池志輾柏舉裂禮柰度蛟經棄序黑騎黔山朱
旗頽渚短兵接伍長鎩為羣顥如海岸矗似峰雲合乃
霧激離則霰分荆國既軼郢縣方焚袁劉二戾茲起煒
發聯謀制外儲兵內襲釁激瓊殿勢崩金闕志乘玄壘
圖矯秘鉞鴻妖逝星高祲棄月惟時諸侯上脫下競圖
服洧蕩實綴仁聖輝耀國靈尊揚主命曾規近晰深暮

遠鏡左輪朱赭表裏斯定七德飾歌九功絳詠乃陟上
鉉寵文方輝誕錫有秩綵吹旌旗贊政瑤光翊教太微
實曰太傅爰登相國緝氓以禮綜祇以德景福咸濬芳
猷允塞羽泳式造絃縣是則金湯無險軌書攸同迴迴
寵迹窈窈睿功寶珪黛壤俾王于東絢冊是敷懋物既
崇設業設虞丹懸碧鏞於穆顯相黎元時邕水洲炎徼
來獻其鰥鴈海龍關亦柔好音梁鼃棧鼉越險浮深遠
戎皆覲上靈必臨山吐石青野降蜜露瑞芝麗草珍柯

爛樹入山崩俗締玄緯幽數睠此妙德改我王度遙滯炎
旻既變至公萎蕤媯華文祖受命大宋有訓高撝萬邦
容豫慶雲游衍南風正服寶位圓光玉繩御繡懷古負
黼夙興邱礪必靜淵漪咸澄勛宸有作黔牖其義矜卑
廣慈合賤兼愛綴機剝賊輕章削罰迹去繁侈情歸素
一軒靡龍刻楹無丹密越賤申椒楚輟靈橘陵寢起邑
池藻誰縣遙館罕御離房空薦惇教露宮淹神正殿斟
酌信義左右律禮瑩彼皇維燿茲國體育業既樹壁流

方啟漢求金岫吳寶銅塹寧若睿德讓駟却劍實才為
貴唯功是念火職咸允雲官亦熙既臯乃益匪稷伊夔
無舛巡風寧竢辨詩玉燭調文金英最節來山呈瑞航
海歸闕不曠景冊靡空歲月受緯機衡兼甄書史孫韓
合辨莊墨異理昭政往藹洗鑠前軌逍遙星斗徙倚涼
雲春飈方舞秋鴻初分式謠式詠載績載文邈哉我后
淪泳賢聖罄品作號盡物歸政蒼黎汰穢玄靈刷慶永
戩嘉祉方寅景命締詳有文颺沛將掩理昧人詖道懸

世險負路遺圖忌華徇儉文閤陳几翌明告漸蜺僑關
食日月肫精矧在乘輿宇折宙傾祲纏鸞掖悲赴紫局
去璇臺之照襲珠蟠之冥嗚呼哀哉帷宮低景輦路戲
光惻柏門之黯黯泣松帳之茫茫上宮擗而詔御咽羣
后慕而侍衛傷攢靈既儼遠日以筆鬱鬯既奠龍酌方撤
素月夜橫翠烟曉結攢虛金而下歛吟空簫而增絕鳴
呼哀哉於是颯天駕而從綺輿蒞神行而撫文輦傍建
春而南蹕徑宣陽而東踐尚蓋蓋而未散乍眇默而不

轉睇千乘之共吸盼萬騎之相泣悲魏后之戀譙惻漢
主之懷沛辭金陵之匪義降雲陽之杳藹風奇響而駐
軒烟異色而低旆怨街邑之綵驂弔原野之縞蓋挽夫
愴而征馬凝痛縈盈其如帶嗚呼哀哉複林油雲重山
減日御房清淒神路冥謐昭徒肅肅幽祇竦蹕攀光灑
動臨泉澍泗瑯座長嚴雕宮永閤寂悵寂兮寂已遠夜
缸夜兮夜何遽嗚呼哀哉

宋故尚書左丞孫緬墓誌文

光靈維周肇祀伊衛炤分上代鏡華中世睿誕降明秀
芳嗣烈學惟物範行實士節容與書林優遊史藝素巾
俄冠朱紱累轍來訪詩逸入詢禮缺麗名文質齊影儒
詰慶履匪舒沴氣遽結殞惟兮既晦泉火兮已閉睽遺
波于遙緒颯流馨于遠歲

宋故安成王右常侍劉喬墓誌文

丹陽韞聖豐鄉降賢玉葉既積金徽方傳乃毓伊人克
廣克宣騰芬中屬飛藻上年杳杳虛素永永沖闕雲意

霜拍瓊立冰堅家寶以瑩國才未甄參錯報善茫昧雲
玄斂魂幽石委氣空山膚若流波身如絕烟芳菲一逝
美懋徒鐫

宋故銀青光祿大夫孫奭墓誌文

川祇効鏡岳祥獻明碧葉獨秀瑤源自清幼炳器譽夙
耀才名體兼遷雲學備儒史紫閣咸趨朱軒既履貴交
慕塵素遊企軌騰藻上京振彩下國如彼綠蘭兼芬四
塞歎人選之不平歎天路之冥默貴夫君之為美播靈

均與正則

齊故御史中丞孫詵墓誌文

筠以霜藹蘭以風薰深哉若人實好斯文系緒承胄激
藹驚芬才基魏梁學參漢雲覽志上載洽鏡前聞騰名
冠俗揚采絕羣方總明世式贊睿君如何不淑天道難
分敢雕窆石永晰幽墳

齊故司徒右長史檀超墓誌文

惟金有銑惟玉有瑤君實淵哉行為世標高志灑落逸

氣寂寥奧學內溢深文外昭嘉采籍譽登國振朝亦既有美筠傷蕙凋人邇運曠世促道遼永矣仁矣流芳無澆

蕭驃騎祭石頭戰亡文

咸告忠貞之魂曰義惟行首雄實士節嗟爾驍驚稟才蹈烈守玉不渝懷水可折氣彰靡旗情激亂轍高墉摧堅巨醜挫銳深痛克矜冤靈及雪隆恩殊悼臨爾以歛千秋同盡百齡一世魂而有知咸無遠邇嗚呼哀哉

蕭太傅東耕呪文

敬呪先穡曰攝提方春黍稷未華灼爍發雲昭耀開霞
地煦景暖山艷水波側聞農政實為民天競拒獻歲務
畎上年有滄疎潤興雨導泉崇耕巡索均逸共勞命彼
倌人祝於青臯羽旗銜蕤雄戟耀毫呈典緇耜獻禮翠
壇宜民宜稼克降祈年願靈之降解珮停鑾神之行兮
氣為輶神之坐兮烟為蓋使嘉穀興玄鬯永爭光而無
沫哉

南齊文紀卷九

欽定四庫全書

南齊文紀卷十

明 梅鼎祚 編

江淹 三

雲山讚四首

并序

壁上有雜畫皆作山水好勢仙者五六雲氣生焉悵然
會意題為小讚云

王太子

子喬好輕舉不待煉銀丹控鶴去窈窕學鳳對嶺岵山

無一春草谷有千年蘭雲衣不蹢躅龍駕何時還

陰長生

陰君惜靈骨珪壁詎為寶日夜名山側果得金丹道憂傷永不至光顏如碧草若度西海時致意三青鳥

白雲

紫烟世不覿赤鱗庖所捐白雲亦海外蒼蒼起三山蕭瑟玉池上容裔帝臺前欲知青都裏乘此乃登天

秦女

青琴既曠世綠珠亦絕羣猶不及秦女十五乘綵雲壁
質人不見瓊光俗詎聞願使洛靈往為我道音芬

銅劍讚

崇文書目銅
劍讚一卷

永明初始造舊宮鑿東北之地皆平岡迤隴尤多古冢
墓有人得銅劍長尺五寸余既借看歎其古異客有謂
余曰古時乃以銅為兵乎其可得而聞不余笑而應曰
此證據甚多殆不俟言卿既欲知輒具言之余按山海
經曰昆吾之山其上多赤銅郭璞注曰此山出金如火

以之切玉如割泥也周穆王時西戎獻之尸子所謂昆
吾之劍也越絕書曰赤瑾之山破而出錫若耶之谿涸
而出銅歐冶鑄以為純鉤之劍又汲冢中得一銅劍長
三尺五及今所記干將者亦皆非鐵明古者以銅錫為
兵器也周書稱穆王時征犬戎得昆吾之劍火浣布長
尺有咫又有鍊銅赤刀切玉如泥焉又左傳僖公十八
年鄭伯始朝于楚楚賜之金既而悔之盟曰無以鑄兵
故以鑄三鍾杜預注云楚金利故也古者以銅為兵故

禹貢云荆揚貢金三品余以為古者語質而難解今者
語文而易了獨詩云元龜象齒其實象牙也書云厥包
橘柚乃黃柑也金品上則黃中則赤下則黑黑金是鐵
赤金是銅黃金是金黃金可為寶赤金可為兵黑金可
為器韓子稱昔智伯繇之伐趙襄子初晉陽襄子金將
盡問於張孟談孟談對曰吾聞董安于治晉陽也公室
悉以銅為柱質君可發而用之於是發之有餘金矣謂
此據蓋可知焉又昔夏后氏使九牧貢金鑄九鼎於荆

山之下于昆吾氏之墟白若甘攬之地圖其山川奇怪以形于鼎使民知神姦不逢其害以定其祥鼎成三足而方不炊而自沸不昇而自藏不遷而自行九鼎既成定之國都桀有昏德鼎遷于商殷紂暴虐鼎遷于周每人主休明鼎雖小而重其姦回昏亂雖大而輕及周顯王三十二年姬德大衰乃淪入泗水秦始皇之初見于彭城二十七年始皇東遊大發徒出之而不能得焉後漢武帝賓禮百神于汾陰得大鼎時人以為九鼎其詳

不可得而審也且荆軻刺秦王之日匕首擊銅柱銅柱
火出則古者非直以銅為匕首亦以為殿柱也且始皇
之世長狄十二見于臨洮身長三丈足跡六尺於是始
皇斂天下之兵鑄而象之故西京賦云高門有閼列坐
金狄是也又造阿房之宮其門悉用鎡石鎡石喻鐵以
防外兵之入焉以此推之明知春秋迄于戰國戰國至
於秦時攻爭紛亂兵革互興銅既不充給故以鐵足之
鑄銅既難求鐵甚易是故銅兵轉少鐵兵轉多年甚一

年歲甚一歲漸染流遷遂成風俗所以鐵工比肩而銅工稍絕二漢之世逾見其微及漢建安二十四年魏文帝為太子時鑄三寶刀二匕首天下百鍊之精利而悉是鑄鐵不能復鑄銅矣按張華博物志亦稱鑄銅之工不復可得唯蜀地羌中時有解者由此言之斯妙久絕余謂不復能鑄銅者正當不能使利如霜雪光如雲霞陸斬犀兕水斷蛟龍豈復不能鑄銅鑪錠鐙耶然今太極殿前兩大銅鏡即周景王鑄也製作精巧獨絕晚世

今之作必不及古猶今鏡不及古鏡今鐘不及古鐘矣
昔余為吳興令鑿池又獲銅箭鏑數十枚時有人復於
彼山中伐木得銅斧一口古銅鑄為兵豈為一據故備
言其詳以發予之蒙矣古貴銅賤鐵非獨此事按皇覽
帝王冢墓記稱吳王闔閭冢銅槨三重汞池六尺玉覓
之流扁諸之劍三盤郢魚腸之劍在焉秦始皇冢亦以
銅槨水銀為江河關東賊發之至銅槨而取銅深大不
可多得因此穴塞漢陳思王冢特奢侈皆生葬取愛幸

奴僕婢蓄穀為銅窻以通殉葬者氣息兼以水火守冢
給呼召數十年乃不復聞聲矣晚世之葬無復此例
然由是大奢大富大盛或傾一國之財或竭一家之寶
或爭為宏麗或競相高尚前漢奢于後漢魏時富于晉
世中原既夷至于江左時天下凋喪制度日衰富貴之家
猶或厚葬然論古論曩亦減損千萬倍矣世愈貧狹哀
禮愈薄又往古之事棺皆不用釘悉用細腰其細腰之
法長七寸廣三寸厚二寸五分狀如木杵兩頭大而中

央小仍鑿棺際而安之因普漆其外一棺凡用細腰五十四枚大略如此亦可謂至巧矣其法既絕亦有銅釘銅釘之體皆如今柘釘形也銅釘既滑多被發掘自義熙以來乃以柘代桐爰及明器之屬亦多減省必不得已而用烏牙焉相與皆用素棺不得施漆及自棺之外一無所設既由貧富之懸兼以避患之及耳故為此讚以明古今銅鐵之兵刃葬送之事焉乃成讚曰

悠悠開闢或聖或賢蚩尤鑄銅為兵幾年天生五材實

此為先既古既曩誰測誰傳紛綸百代事無不異況乃
金鐵國之利器風胡專精歐冶妙思於昔則出於今則
祕聞之釋經萬物澹薄在古必厚在今必惡徒侈徒異
徒劇徒削聊舉一槩以明鴻略

草木頌十五首

并序

僕一命之微遭萬代之幸不能鑄心礪骨以報所事擢
翼驤首自致丹梯爰乃恭承嘉惠守職闕中且僕生人
之樂久已盡矣所愛兩株樹十莖草之間耳今所鑒處

前峻山以蔽日後幽晦以多阻飢猿搜索石瀨爰爰庭
中有故池水常決雖無魚梁釣臺處處可坐而葉饒冬
榮花有夏色茲赤縣之東南乎何其奇異也結莖吐秀
數千餘類心所憐者十有五族焉各為一頌以寫勞魂

金荊

江南之山連嶂連天既抱紫霞亦漱絳烟金荊嘉柯涵
露宅仙姝節詎及幽意誰傳

相思

竦枝碧澗卧根石林日月斷色霧雨恒陰綠秀八焰丹
實四臨公子不至山客徒尋

豫章

伊南有材匪桂匪椒下貫金壤上籠赤霄盤薄廣結梢
瑟曾喬七年乃識非曰終朝

枅櫚

異木之生疑竹疑草攢叢石逕森從山道烟岫相珍雲
壑共寶不華不縟可避工巧

杉

桐梓舊麗松枯稱奇馬如茲品獨秀青崖羣木斂望雜
草不窺長入烟氣永叅鸞螭

檉

木貴冬榮檉實寒色停黛峰頂插翠石側碧葉菴藹
柯翕施方陋筠櫝遠笑荆棘

楊梅

寶跨荔枝芳軼木蘭懷蕊挺實涵黃糝丹鏡日繡壑炤

霞綺巒為我羽翼委君玉盤

山桃

惟園有實惟山有叢丹
鵲掌露紫榮繞風引霧如電映
烟成虹伊春之秀乃華之宗

山中石榴

美木艷樹誰望誰待縹葉翠萼紅華絳采怡列泉石芬
披山海奇麗不移霜雪不改

木蓮

迸采泉壑騰光淵
邱綳麗碧嶽紅艷
桂洲山人結侶靈
俗共遊時至不採
為予淹留

石上菖蒲

藥實虛品爰乃輔
性却痾衛福蠲邪
養正縹色外妍金
光內映草經所珍
仙圖是詠

黃連

黃連上草丹砂之
次禦孽辟妖長靈
久視驂龍行天馴
鳳匝地鴻飛以儀
順道則利

署預

華不可炫葉非足憐微根儻餌棄劍為仙黃金共壽青
鴈爭妍君謂無妄我驗衡山

杜若

山中杜若嘉爾翠質不奇不俗載華載實同銜夕露共
烘朝日夷險無二沈冥如一

藿香

桂以過冽麝以太芬摧阻天壽夭折人文詎及藿香微

馥微薰攝靈百仞養氣清霄

雜體三十首序

夫楚謠漢風既非一國魏製晉造固亦二體譬猶藍朱
成彩雜錯之變無窮宮角為音靡曼之態不極故蛾眉
詎同貌而俱動於魄芳草寧共氣而皆悅於魂不其然
歟至於代之諸賢各滯所迷莫不論甘則忌辛好丹則
非素豈所謂通方廣恕好遠兼愛者哉乃致公幹仲宣
之論家有曲直安仁士衡之評人立矯抗况復殊於此

者乎文貴遠賤近人之常情重耳輕目俗之恒蔽是以邯鄲託曲于李奇士季假論于嗣宗此其効也然五言之興諒非復古但關西鄴下既以罕同河外江南頗為異法故玄黃經緯之辨金碧浮沉之殊僕以為亦各具美兼善而已今作三十首詩敷其文體雖不足品藻淵流庶亦無乖商榷云爾

倡婦自悲賦序

漢有其錄而亡其文泣蕙草之飄落憐佳人之埋暮乃

為辭焉

青苔賦序

余鑿山楹為室有苔焉意之所之故為是作云

石刼賦序

刼一作蛙

海人有食石刼一名紫鰲蚌蛤類也春而發華有足異者戲書為短賦

蓮華賦序

余有蓮華一池愛之如金宇宙之麗難息絕氣聊書竹

素儻不滅焉

丹砂可學賦序

咸曰金不可鑄僕不信也試為此辭精思云爾

赤虹賦序

東南嶠外爰有九石之山乃紅壁十里青萼百仞苔滑
臨水石險帶溪自非巫咸采藥羣帝上下者皆斂意焉
於是夏蓮始舒春蓀未歇肅飭波渚緩拽汀潭正逢巖
崖相炤雨雲爛色俄而雄虹赫然暈光耀水偃蹇山頂

舄奕江湄僕追而察之實雨日陰陽之氣信可觀也又
憶昔登鑪峰上手接白雲今行九石下親弄絳霓二奇難
并感而作賦

橫吹賦序

驃騎公以健卒十萬禦荆人于外郊鐵馬煩而人聳色
綵旄耀而士銜威軍容有橫吹僕感而為之賦云

傷友人賦序

僕之神交者嘗有陳郡之袁炳焉有逸才有妙賞博學

多聞明敏而識奇異僕以為天下絕倫黯與秋草同折
今不復見才矣既而陳書有念橫瑟無從雖乏張范通
靈之感庶同嵇向篤徒之哀乃為辭曰

知己賦序

陳國之華者故吏部郎殷孚其人也博而能通學無不
覽雅賞文章尤愛奇逸雖志隱巖石而名動京師矣才
多深見氣有遠度雖安期千里不能尚焉始於北府相
值傾蓋無已僕乃得罪嶠外遐路窈然始還舊都會君

尋卒故為茲賦以寄深哀

學梁王兔園賦序

或重古輕今者僕曰何為其然哉無知音則已矣聊為古賦以奮枚叔之製焉

傷愛子賦序

廣弘明集

江亢字肩卿僕之第二子也生而神俊必為美器惜哉遭閔涉歲而卒悲至躑躅乃為此文

遂古篇序

弘明集

僕嘗為造化篇以學古制今觸類而廣之復有此文兼象天問以遊思云爾

雜三言五首序

予上國不才黜為中山長史待罪三載究識烟霞之狀既對道書官又無職筆墨之勢聊為後文

自序

淹字文通濟陽考城人幼傳家業六歲能屬詩十三而孤邈過庭之訓長遂博覽羣書不事章句之學頗留精

於文章所誦詠者蓋二十萬言而愛奇尚異深沈有遠
識常慕司馬長卿梁伯鸞之徒然未能悉行也所與神
遊者唯陳留袁叔明而已弱冠以五經授宋始安王劉
子真略傳大義為南徐州王新安從事奉朝請始安之
薨也建平王劉景素聞風而悅待以布衣之禮然少年
嘗倜儻不俗或為世士所嫉遂誣淹以受金者將及抵
罪乃上書見意而免焉尋舉南徐州桂陽王秀才對策
上第轉巴陵王右常侍右軍建平王主簿賓待累年雅

以文章見遇而宋末多阻宗室有憂生之難王初欲羽
檄徵天下兵以求一旦之幸淹嘗從容曉諫言人事之
成敗每曰殿下不求宗廟之安如信左右之計則復見
麋鹿霜棲露宿於姑蘇之臺矣終以不納而更疑焉及
王移鎮朱方也又為鎮軍叅事領東海郡丞於是王與
不逞之徒日夜構議淹知禍機之將發又賦詩十五首
略明性命之理因以為諷主遂不悟乃憑奴而黜之為
建安吳興令地在東南嶠外閑越之舊境也爰有碧水

丹山珍木靈草皆淹平生所至愛不覺行路之遠矣山
中無事無道書為偶乃悠然獨往或日夕忘歸放浪之
際頗著文章自娛在邑三載朱方竟敗焉復還京師值
世道已昏守忠閑居不交當軸之士俄皇帝始有大功
於四海聞而訪召之為尚書駕部郎驃騎竟陵公叅軍
事當沈攸之起兵西楚也人懷危懼高帝嘗顧而問之
曰天下紛紛若是君謂如何淹對曰昔項強而劉弱袁
衆而曹寡羽號令諸侯竟受一劍之辱紹跨躡四州終

為奔北之虜此所謂在德不在鼎公何疑焉帝曰聞此
言者多矣其試為我言之淹曰公雄武有奇略一勝也
寬容而仁恕二勝也賢能畢力三勝也民望所歸四勝
也奉天子而伐逆叛五勝也攸之志銳而器小一敗也
有威而無恩二敗也士卒解體三敗也搢紳不懷四敗
也懸兵數千里而無同惡相濟五敗也故豺狼十萬而
終為我獲焉帝笑曰君談過矣是時軍書表記皆為草
具建東霸城府猶掌筆翰相府始置仍為記室叅軍事

及讓齊王九錫備物及諸文表皆淹為之受禪之後又
為驃騎豫章王記室叅軍鎮東武令參掌詔冊並典國
史既非雅好辭不獲命尋遷正員散騎侍郎中書侍郎
淹嘗云人生當適性為樂安能精意苦力求身後之名
哉故自少及長未嘗著書惟集十卷謂如此足矣重以
學不為人交不苟合又深信天竺緣果之文偏好老氏
清靜之術仕所望不過諸卿二千石有耕織伏臘之資
則隱矣常願幽居築宇絕棄人事苑以丹林池以綠水

左倚郊甸右帶瀛澤青春爰謝則接武平臯素秋澄景
則獨酌虛室侍姬三四趙女數人不則逍遙經紀彈琴
詠詩朝露幾間忽忘老之將至淹之所學盡此而已矣

尚書殿中曹

廟樂歌詩奏

建元初詔黃門侍郎謝超宗造廟
樂歌詩十二章永明二年尚書殿

中曹奏

詔可

太祖高皇帝廟神室奏高德宣烈之舞未有歌詩郊應
須歌辭穆皇后廟神室亦未有歌辭案傳云云登歌廟

異其文饗神十室同辭此議為允又尋漢世歌篇多少
無定皆稱事立文並多八句然後轉韻時有兩三韻而
轉其例甚寡張華夏侯湛亦同前式傅玄改韻頗數更
傷簡節之美近世王韶之顏延之並四韻乃轉得賒促
之中顏延之謝莊作三廟歌皆各三章章八句此於序
述功業詳略為宜今宜依之郊配之日改降尊作主禮
殊宗廟穆后母儀之化事異經綸此二歌為一章八句
別奏事御奉行

移魏淮陽太守文

永明十年太歲某淮陽太守某移淮陽長大齊承乾得
一清寧今皇上體聖居震纘戎昌緒仁澤之所灑沾惠
風之所偃靡威武之所騰驤刑政之所宣暢浩浩乎其
不可涯涘固能徼岷禺闕夷海拓沙渚道零山八肩承
嗣九垓禔福含齒戴髮其樂只且所以通歡魏境靜息
邊民嗟爾黔民共和優泰而魏主不篤我信誓侮弱我
慈懷憑陵我南城冠擾我樊鄧元帥逞梟鷲之心銳卒

蓄蜂蠆之毒蠅飛藩棘蟻附池隍我聊命偏將執而俘
之連左衽于郊門頻編首於我闕有司將加誅焉天子
弗之許也重謁而請天子又不許也更從請所以置之
乃制詔曰昔虞帝欽明苗山記倒戈之陣夏后踵武鈞
臺載不戰之兵今鋒鏑陵邊彤雲入候加討而後擒待
征而知服此乃朕之涼德彼將何德徒哀其積習為性
因染遂變不識天時用干人事雖同濱率境自隔王臣
直曰斯民獨為索虜父母生乖妻兒死別桑梓悠悠墳

塋萬里情其慙之可解網改祝聽歸巢穴宜直鄰好足
鄙特以哀矜自中以時資遣稱朕意焉已遵明詔部送
所虜若干人即日在界宜速近獲時施故堡使幽荒之
外知皇王之德音故移

文苑英華。彼將何
德隣好足鄙下有誤

有司奏氏王楊集始母

除集始母姜氏為
太夫人假銀印

集始驅狐翦棘仰化邊服母以子貴宜加榮寵

八座奏陰平王楊炅

進號前將軍
並永明中

楊炅嗣勤西牧馳歎內昭宜增戎章用輝遐外

為為國相邢基祇羅迴

奉高帝表

為為國與魏虜世為讐敵太祖輔政嘗遣使為為尅期共伐魏及踐阼國

邢基祇羅迴奉表
齊亦不能出師

夫四象秉政二儀改度而萬物生焉斯蓋虧盈迭襲歷數自然也昔晉室將終楚桓竊命竇賴宋武匡濟之功故能扶危定傾休否以泰祚流九葉而國嗣不繼今皇天降禍於上宋室猜亂於下臣雖荒遠粗闕圖書數難以來星文改度房心受變虛危納祉宋滅齊昌此其驗

也水運遘屯木德應運子年垂刈劉穆之記崕嶺有不祚之山京房識云卯金十六草肅應王歷觀圖緯休徵非一皆云慶鍾蕭氏代宋者齊會有大力法度及於此國使反採訪聖德彌驗天縱之姿故能扶隆皇祚光權定之業翼亮天工濟悖主之難樹勲京師威振海外仗義之功侔蹤湯武冥績既著寶命因歸受終之歷歸于有道况夫帝無常族有德必昌時來之數唯靈是與陛下承乾啟之機因乘龍之運計應符革祚久已踐極荒裔

傾戴莫不引領設未龍飛不宜沖挹上違天人心下
乖黎庶之望皇為承緒肇自二儀拓土載民地越滄海
百代一族大業天固雖吳漢殊域義同唇齒方欲尅期
中原龔行天罰治兵繕甲俟時大舉振霜戈於并代鳴
和鈴於秦趙掃殄凶醜梟翦元惡然後皇輿遷幸光復
中華永敦隣好倖蹤齊魯使四海有奉蒼生咸賴荒餘
歸仰豈不盛哉

百濟國王牟大

牟慶之孫
牟都之子

上武帝表

南齊書有闕南史東夷傳齊永明中除大都督百濟諸軍事鎮東大將軍

前段闕

報功勞勤實存名烈假行寧朔將軍臣姐瑾等四

人振竭忠効攘除國難志勇果毅等威名將可謂扞城
固蕃社稷論功料勤宜在甄顯今依例輒假行職伏願
恩愍聽除所假寧朔將軍面中王姐瑾歷贊時務武功
並列今假行冠軍將軍都將軍都漢王建威將軍八中
侯餘古弱冠輔佐忠効夙著今假行寧朔將軍阿錯王
建威將軍餘歷忠欵有素文武列顯今假行龍驤將軍

邁盧王廣武將軍餘固忠効時務光宣國政今假行建威將軍弗斯侯

又表

臣所遣行建威將軍廣陽太守兼長史臣高達行建威將軍朝鮮太守兼司馬臣楊茂行宣威將軍兼叅軍臣會邁等三人志行清亮忠欵夙著往太始中比使宋朝今任臣使冒涉波險尋其至効宜在進爵謹依先例各假行職且玄澤靈休萬里所企況親趾天庭乃不蒙賴

伏願天監特愍除正達邊効夙著勤勞公務今假行龍
驤將軍帶方太守茂志行清壹公務不廢今假行建威
將軍廣陵太守邁執志周密屢致勤効今假行廣武將
軍清河太守

武帝命年大襲封百濟王策

於戲惟爾世襲忠勤誠著遐表滄路肅澄要貢無替式
循彛典用纂顯命往欽哉其敬膺休命可不慎歟

制詔

制詔行都督百濟諸軍事鎮東大將軍百濟王牟大令
以大襲祖父牟都為百濟王即位章綬等五銅虎威符
四王其拜受不亦休乎

上明帝表

牟大受封之歲魏虜發騎數十萬攻百濟大遣將沙法名等擊虜軍大敗

之建武二年上表請賜軍號詔可○南齊書有缺按此表云去庚午年則受封為武帝之年也
永明八年也

臣自昔受封世被朝榮忝荷節鉞尅攘列辟往姐瑾等
並蒙光除臣庶咸泰去庚午年獫狁弗悛舉兵深逼臣

遣沙法名等領軍逆討宵襲霆擊匈奴張惶摧崩若海
蕩乘奔追斬僵尸丹野由是摧其銳氣鯨暴韜凶今邦
宇謐靜實名等之略尋其功勲宜在褒顯今假沙法名
行征虜將軍邁羅王贊首流為行安國將軍辟中王解
禮昆為行威武將軍弗中侯木干那前有軍功又拔臺
舫為行廣威將軍面中侯伏願天恩特愍聽除

又表

臣所遣行龍驤將軍樂浪太守兼長史臣慕遺行建武

將軍城陽太守兼司馬臣王茂兼參軍行振武將軍朝
鮮太守臣張塞行揚武將軍陳明在官忘私唯公是務
見危授命蹈難弗顧今任臣使冒涉波險盡其至誠實
宜進爵各假行署伏願聖朝特賜除正

扶南國王僑陳如闍耶跋摩

姓僑陳如名
闍耶跋摩

上武帝表

林邑國西南三千餘里至扶南天竺道人那
伽仙附扶南商貨欲歸國遭風至林邑掠其
財物皆盡永明二年闍耶跋摩遣那伽仙上
表詣京師言其國俗事摩醯首羅天神神常

降於摩耽山土氣恒
暖草木不落詔報之

扶南國王臣僑陳如闍耶跋摩叩頭啟天化撫育感動
靈祇四氣調適伏願聖主尊體起居康豫皇太子萬福
六宮清休諸王妃主內外朝臣普同和睦隣境士庶萬
國歸心五穀豐熟災害不生土清民泰一切安穩臣及
人民國土豐樂四氣調和道俗濟濟並蒙陛下光化所
被咸荷安泰

又

臣前遣使齎雜物行廣州貨易天竺道人釋那伽仙於
廣州因附臣舶欲來扶南海中風漂到林邑國王奪臣
貨易并那伽仙私財具陳其從中國來此仰序陛下聖
德仁治詳議風化佛法興顯衆僧殷集法事日盛王威
嚴整朝望國軌慈愍蒼生八方六合莫不歸伏如聽其
所說則化鄰諸天非可為喻臣聞之下情踊悅若暫奉
見尊足仰慕慈恩澤流小國天垂所感率土之民並得
皆蒙恩祐是以臣今遣此道人釋那伽仙為使上表問

訊奉貢微獻呈臣等丹心并別啓下情但所獻輕陋愧懼唯深伏願天慈曲照鑒其衷丹款賜不垂責

又

臣有奴名鳩酬羅委臣逃走別在餘處構結凶逆遂破林邑仍自立為王永不恭從違恩負義叛主之誓天不容載伏尋林邑昔為檀和之所破久已歸化天威所被四海彌伏而今鳩酬羅守執奴凶自專狼彊且林邑扶南隣界相接親人是臣奴猶尚逆去朝廷遙遠豈復遵

舉此國屬陛下故謹具上啟伏聞林邑頃年表獻簡絕
便欲永隔朝廷豈有師子坐而安犬鼠伏願遣軍將伐
凶逆臣亦自効微誠助朝廷剪撲使邊海諸國一時歸
伏陛下若欲立餘人為彼王者伏聽敕旨脫未欲灼然
興兵伐林邑者伏願特賜勅在所隨宜以少軍助臣乘
天之威殄滅小賊伐惡從善平蕩之日上表獻金五婆
羅今輕此使送臣丹誠表所陳啟不盡下情謹附那伽
仙并其伴口具啟聞伏願愍所啟

天竺道人那伽仙上書

吉祥利世間感攝於羣生所以其然者天感化緣明仙
山名摩耽吉樹敷嘉榮摩醯首羅天依此降尊靈吉士
悉蒙祐人民皆安寧由斯恩波故是以臣歸情菩薩行
忍慈本迹起凡基一發菩提心二乘非所期歷生積功
業六度行大悲勇猛超劫數財命捨無遺生死不為厭
六道化有緣具修於十地遺果度人天功業既已定行
滿登正覺萬善智圓備惠日照塵俗衆生感緣應隨機

授法藥佛化遍十方無不蒙濟擢皇帝聖弘道興隆於
三寶垂心覽萬機威恩振八表國土及城邑仁風化清
皎亦如釋提洹衆天中最超陛下臨萬民四海共歸心
聖慈流無疆被臣小國深

武帝報詔

具摩醯降靈流施彼土雖殊俗異化遙深欣讚知鳩酬
羅於彼背叛竊據林邑聚兇肆掠殊宜剪討彼雖介遐
陋舊修蕃貢自宋季多難海譯致壅至化惟新習迷未

革朕方以文德來遠人未欲便興干戈王既款列忠到
遠請軍威今詔交部隨宜應接伐叛柔服寔惟國典勉
立殊効以副所期

會稽刻石山大石文

會稽剡縣刻石山相傳為
名不知文字所在昇明末

縣民兒龔祖行獵忽見石上
文三處刊苔識之大石文曰

此齊者黃公之化氣也

立石文

黃天星姓蕭字某甲得賢帥天下太平

小石文

刻石者誰會稽南山李斯刻秦望之封也

嵩高山石墾文

宋昇明三年滎陽人尹午於山東南隅見天雨石墜地石間有

壘在其中方二寸其文曰

戊丁之人與道俱肅然入草應天符

有司奏沸泉木簡文

延陵令戴景度稱所領季子廟舊有涌井二所廟祝列云舊井北忽聞金石聲即掘深三尺得沸泉其東忽有

聲鈔鈔又掘得泉沸湧若浪泉中得一銀木簡長一尺
廣二寸隱起文曰廬山道人張陵再拜謁詣起居簡木
堅白而字色黃謹按瑞應圖浪井不鑿自成王者清靜
則仙人主之孔氏世錄云叶精帝道孔書明巧當在張
陵宋均注云張陵佐封禪一云陵仙人也

璽文

永明二年虜國民齊祥入靈丘關見山側
有紫氣如雲衆鳥回翔其間獲璽方寸四


分獸紐師道人惠度覩其文
以衣冠正朔在齊送京師

坤維聖帝永昌

銅獸銘

永明三年越州南高涼俚人
海中網魚獲銅獸一頭銘曰

作寶鼎齊臣萬年子孫承寶



南齊文紀卷十